

كان عمرى ستاشر ربيع

شعر

محمد فهمي



(20)

سلسلة شهرية تعنى بنشر إبداعات الشباب

• هيئة التحرير ورئيس التحرير د. هيئة التحرير د. هيئة الحاج عملى مدير التحرير السعيد المصرى التحرير سكرتير التحرير يونس شعبان

هلمله کنابخ

تصدرها الهيئة العامة لقصور الثقافة

رئيس مجلس الإدارة
سعد عبد الرحمن
أمين عام النشر
محمد أبوالمجد
مدير عام النشر
ابتهال العسلى
الإشراف الفتى
د. خياليد سيرور

- کان عمریستاشرربیع
 - د. محمد فهمی

الهيئة العامة لقصور الثقافة القاهرة 2013م 5ر3ا × 5ر9ا سم

تصمیم الغلاف،

أحمد الجنابيني

- تدفيق لغوى، ياسر المحمدي
 - رقم الإيداع،٢٠٤٦٢/ ٢٠١٢
- الترقيم الدولي: 42-4-517-718-978
 - الدراسلات:

باسم / مدير التحرير على العنوان التالى: 16 شارع أمين سسامى - قسمسر السعسيستى القاهرة - رقم بريدى 1561 ت، 180، 2794789

الطباعة والتنظيذ ،
 شركة الأمل للطباعة والنشر
 ت ، 23904096

الأراء الواردة في هذا الكتاب لا تعبر بالضرورة عن توجه الهيئة بل تعبر عن رأى وتوجه المؤلف في المقام الأول.

حقوق النشر والطباعة محقوظة للهيئة العامة لقصور الثقافة.
 يحظر إعادة النشر أو النسخ أو الاقتباس بأية صورة إلا بإذن
 كتابى من الهيئة العامة لقصور الثقافة. أو بالإشارة إلى الصدر.

کان عمری ستاشر ربیع

أبويا

ما عرفتش قيمته..
غير بعد ما مات
غير بعد الوقت ما فات بكتير
ما سمعتش صوته..
غير بعد ما بطل ينده..
ع الورده الدبلانه ف قلب أجنده عبير أطلاله
كان طيب جدا وف حاله
إن يضحك..
الفجر النايم يصحى له
والصبح يشقشق..
وتظير فراشات حواليه

ما بكيتش عليه واشتقت إليه

غير بعد ما فات على ذكرى رحيله

صيفين وأربع أعياد

ما وقفتش على روحه حداد

غير بعد ما سافر قلبي بلاد الحزن وعاد . .

مكسور الجناحين

غير بعد ما شفت ديابه تحت جلود البني آدمين

مش كنت تقول يا ابا . .

إن الغابه أرحم من غدر الأصحاب

مش كنت تشد وراك الباب

بعدك يا ابا . .

مت من البرد وم الرعد وم الريح

وغرقت ف دمع التماسيح . .

ملايين المرات

مش كنت تسيب..

تواشيح الفجر في ريح

أمسيات أحزاني

مش كنت تقول يا ابا . .

إنك رايح مش راجع تاني

مش كنت تسيب..

حضنك مبكى لأوجاعي

أو ضهرك عكاز لدراعي

من غيرك يا ابا . .

الدنيا ما فيش داعي أعيشها

من غير ريشها العصفوره تطير إزاى

من غير الناى . .

الراعى يجوت

كان هادى الأعصاب وبيعشق "عبد الوهاب"

ويغنى معاه "خي"

وف كل صلاه..

واقف ف الصف الأول زى المشكاه

كان جدول حنيه

كان دايما يلبس جلابيه وطاقيه شبيكي

كان أجمل وقت..

لما أشرب كوباية شاى وياه ف البلكونه

في ليلة صيف

عمرى ما حسيت بالحر غير بعد ما مات

وكأن وجود الأب ف قلب البيت تكييف كان يطبخ أحسن من أمهر شيف كان يفتح حق التونه من غير سكينه كان دايما يحكى عن أيام الجيش أجمل أيام في حياته بعد أصحابه ما ماتوا ما قدرش يعيش فاكريا ابا.. ولا نسيت على غير العاده حتى نسيت فوق الكومودينو ومت العيش الفينو طبق الفول قرطاس الطعمية أبو نص جنيه فنجان القهوه الساده كيس الأدويه السبحه المصحف الراديو الجرنان

وسجارة الكيلوباتره الوالعه ف قلب الطفايه

والشمس الطالعه تصبح على شيش شباكك فينك يا ابا وفين أراضيك

أخبارك إِيه؟

يعنى ما حدش شافك من سنتين

كل ما أرن عليك بتكنسل ليه

ما بتسألش علينا

قلت أطلع أجدع منك وأسأل

إحنا تمام..

بس الأيام من غيرك

مش أيام

طبعا خلاصت علام

وبقیت دکتورزی ما کنت بتحلم

اتخصصت في طب الباطنه

٠

ما فتحتش لسه عياده

لأ . .

ما اتجوزتش لسه

لما أنوى أكيد هتكون أول واحد يعرف

ابا . .

قول إنك بتهزر ممكن ما تجيش إزاى قسما بالله ما انا متجوز من غيرك على رأيك.. وقتها تفرج ماشي الحال مستوره وعال شايلك لكبيره قدها وقدود ربنا موجود شغال دلوقتي في مصر في "الملك الصالح" بعد "السيدة زينب" على طول من غير ما تقول والله بازورها وباصلي الجمعه في "جامع عمرو"

ما عقلتش لکن مش عایزك تزعل منی

مش عارف أبطل تدخين وقرايه وكتابة شعر وسيما مش عارف أوفر قرشين مش عارف أشيل حب النسوان من دمي أمى بخير وأختى بخير كنا ف سيرتك لسه امبارح باليل ماشى خلاص خالى "السيد" سلم لى عليه عارف مستعجل ليه بس اهدى شويه قلبك تعبان لا تموت تاني.

كان عمرى ستاشر ربيع

كان عمرى ستاشر ربيع..
لما بُست بنت الجيران
بوسه..
لسه فى شفايفى طعمها
والبنت قالت لأمها وكانت فضيحه
أبويا لمها
بس من يومها بقيت مهووس
يعنى أموت..
لو مر يوم

كان عمرى ستاشر ربيع..
لا دخنت أول سيجاره فى الحمام أجمل سيجاره شربتها والريجه أبويا شمها وخدت علقه ما انسهاش وعرفت يومها البيتادين والشاش بس ما عرفتش أو جايز عرفت إنى هاكون دكتور رغم أنى ما ليش فى العلم يا هل ترى الصدفه بتلعب دور ولا هى اللى كاتبه كل الفيلم.

كان عمرى ستاشر ربيع . . لا قريت أول ديوان وركبت مركب ورق . . وسافرت بلاد بعيده واصطادت أول قصيده من كف بنت اسمها "مياده" من يومين كنت قاعد في العياده ولاقيتها داخله بابنها وف عينها كحل الذكريات تخنت واوحشت جدا زي كل الأمهات بس لسه باحبها بس لسه باحبها بس لسه باحبها لسه شايف إنها ست البنات .

كان عمرى ستاشر ربيع . . لما أبتدى ظهورى فى الجامع يقل وفجورى يزيد كل الكلام ف خطبة الجمعه ممل عايز جديد وعرفت "ماركس" وصاحبت "سارتر" وعشقت "نيتشه" وكرهت "هتلر" وعجبنى "خالد بن الوليد" .

كان عمرى ستاشر ربيع . . لا ابتديت أنى افكر تفكير شيطانى وأسأل أسئله ما لهاش إجابه وأكره كل أشكال الرقابه كان نفسى فى طبيب نفسانى يدينى جلسة كهربا الشعر إيه . . لعنه ولا موهبه والدنيا إيه . . والدنيا إيه . . فابه ولا طيبه والشمس رغم البعد باينه قريبه ليه والبنت لما تحب والبنت لما تحب سافله واللا مؤدبه .

كان عمرى ستاشر ربيع . . لما إبتديت أعشق السيما بجنون وأعشق قعدة القهوه بجنون وأخلق لنفسى دنيا تانيه وكون تانى وأملا كشكول المذاكره.. بالأغاني العاطفيه وأظهر بالهدوم الداخليه في البلكون وأتلصص على صدر جارتي لما تنشر في الغسيل وأعشق كوبرى قصر النيل وأرفع على الآخر صوت الراديو والتسجيل وأسرق فلوس الدروس وأسهر أبوس في المخده وأغنى ويا "كاظم" .. "يا مستبده" وويا "فؤاد" . . "الحب الحقيقي " ويبقى صديقي هديل بنت حلوه في التليفون والفاتوره تقسم ضهر أبويا كل ست شهور ألف رحمه ونور عليه..

مات محسور.. وأرجع كل يوم البيت بعد نص الليل بس أنام بعد ما أسمع للمحاضره وأكره أى حد يقول لى ذاكر مستقبلك هيضيع وألبس سلسله وإنسيال وجينز ضيق وشوز توكيل وأعمل مشكله ويا أمى لو تشيل أى حاجة تخصني من مكانها وأكره دلعها وأكره حنانها وأعمل كبير وأكره أبويا لأنه فقير وأحلم إنى صرت م المشاهير وألزق بوستراتهم ع الحيطان كنت حافظ كل إفيه قاله "هنيدى" . . "ف صعيدى" لما كان عمرى ستاشر ربيع.

عادلإليا

لوشوفته تقول.. إنسان غلبان على باب الله مش دکتور دقنه ليسه نضارته والمشيه بتاعته مشية ناى مكسور والطقم بيفضل لابسه ييجى ست شهور دایما ماشی بکیس متکرمش حاطط فيه السماعه وجهاز الضغط والأكل والأدويه ما تجيب لك شنطه يا "عادل" أحسن من أم الكيس ده

يضحك

ما يردش

ويولع في سيجاره

طب خد منديل إمسح أم النضاره

يضحك

ما يردش

ويولع في سيجاره

وأعرف م الناس..

إِن باباه كان أستاذ دكتور في القصر العيني

جده كان باشا وإقطاعي كبير ووزير

في وزارة "أحمد ماهر"

وأعرف منه إنه عايش مع أخته وأخوه

ف "المنيل"

ذأت مره . .

رحت معاه البيت

الفيلا اللي ساكنها

إيه في فن المعمار

كل جدار ساندع التاني بحب

والسقف تحس بإنه مش موجود

منك للسما على طول والصاله ترمح فيها خيول والشبابيك . .

بتطل على نهار بيزقزق طول الليل بالنهر الخالد والجندول

ذات مره..

وانا قاعد مخنوق

طبطب على كتفى وقال لى بصوت

هو الحنية بذاتها

ما تخيبش الخيبه بتاعتى

قرر من دلوقتى

عايز الطب ولا كتابة الأشعار

أنا شايف إنك موهوب

لكن محتار

إلحق نفسك

وإجمع خطاويك وأرميها في نفس المشوار

ما تخيبش الخيبه بتاعتي

"كوكو" . . ابن أختى

هو اللي مخليني أعيش أيامي الباقيه

هو الياسمينه اللي بتكبر قدامي هو الساقيه اللي بتروى عروقي الدبلانه لما بيركب فوق ضهرى . . ونسافر للنجم العالي الضغط بيتظبط من غير برشام والروماتيزم.. بيحاول يوجعني بعزم ما فيه ما بيقدرش - اتجوزيا محمد قبل العمر ما يسرق عناقيد النور اللي في وشك قبل ما يخنق كتاكيتك أنا حبيتك علشان إنت صريح ما بتعرفش اللف ولا الدوران عامل صايع لكن من جواك غلبان وخجول زی زمان وعرفت بنات

أكتر م اللي انت عارفهم بكتير

وأجمل بمراحل

وكمان كان عندى الشقه والعربيه

والجيب عمران

كان عادل إليا جان طب القصر العيني زمان

كان عندى فضول

وقريت في جميع الأديان

وقريت القرآن

حبيت سيدنا "محمد" حب عباده

حبيت "بوذا" . . "وكونفشيوس"

وكفرت بدين

وآمنت بكل الأديان

لكن لا انضميت لجماعة الإخوان ولا حاجه

كل الفكره

كان عندى فضول

أعرف أفكارهم إيه

وف مره وانا وياهم

طبوا علينا بتوع أمن الدوله واعتقلونا

- يا جماعه

أنا "عادل إليا" مسيحى

وكأنى بانادى ف مالطه ماما ماتت بالجلطه كانت أيام الله لا يعيدها دلوقتي إحنا ف نعمه الواحد يقدر يتكلم من غير ما يخاف زي زمان إوعى تكون بتضايقك أسئلتي بطلت أزعل من كتر الأحزان - هاعمل شای أعملك ويايا عمرك أطول من عمرى أنا فعلا خرمان دولا ليك هوايات باعمل شوبنج مش معقول عمری ما شوفتك جایب حاجه جدیده لأ مانا باشتری شرابات دمك زی الشربات

إمبارح واحنا بنمضى قابلته دولا إزيك فينك من أسبوع فينك من أسبوع أخويا يا سيدى كان بيهد البيت قالها بدون مبالاه وانا عارف إنه بيتقطع من جواه طبطبت عليه وحضنته فرت من عينه دمعه وحيده مسحها بسرعه شد سيجاره من العلبه البوكس

حاول إنه يولعها كذا مره يطفى الكبريت قبل ما تولع إيده بترعش فرت من عيني كذا دمعه وبحزن شديد قمت ناولته الولاعه ولعت لكن وقعت من بُقه ع الأرض طلعت من الكيس المحطوط على حجره حطيتها على صدره ما سمعتش نبض لكن فجأه على فكره مش أول مرة أموت أنا مت كتير وصحيت.

نفسي

نفسى لما الشعر أقوله
يقع الهوى من طوله
والبدر أطوله
والمجد أنوله
زى عطر السوسنه
وتدوب قلوب كل الصبايا
ويصير غنايا فوق شفايف كل عاشق دندنه
ويصير بكايا كاس سعاده
يشربه كل دامع بالهنا
ويصيرصديق للوحيد

نفسى لما الشعر أقوله الكلام يطرح زتون ويطير حمام بين السطور وتصير وتصير كراسى الساده الحضور

أشجار ربيع
وتتفجر الينابيع من السجاد
ويسقف "نزار قبانى"
ويهتف "فؤاد حداد"
وترقص عقود الماس على صدور الزهور
وتسكر كاسات الحنين
والناس تقول
قلت يا ابنى
كل اللى كان نفسنا نقوله ومش عارفين.

سهرالليالي

القافله سايره.. والكؤوس المره دايره الدور وقمرنا يا سهر الليالي طافي النور وأملنا باني قصور رمال وطيورنا طايره للمحال بجناح كسير ووفاءنا وهم كبير وصلاتنا للإخلاص تكفير ذنوب وجراحنا وإن صارت ندوب أليمه مش شغل سیما یا ناس ولا كاس في بار . . ولا كيس فيشار دا الحب لعبة استمرار وفوبيا وعمك "أفلاطون" كان بيضحك ع الدقون باليوتوبيا

ولیلنا کوبیا وساده ووساده خالیه والعقل رغم إنه نضیف بس مش عایز یفکر او یکسر تابو جنس قافل بابه علیه وبانی جدار ما بین الروح والروح ما بین الدوح وأزهارها ما بین الدوح وأزهارها وأسراره رافضه تبوح بأسرارها والقافله سایره ف مشوارها تنوح إمتی تاخد تارها م الطوفان سفینة نوح یا سهر اللیالی.

نصيحة الأخت مياده

يااااله . . . نفس الضحكه نفس الصوت نفس اللمعان الليي ف عينك وهدومك نفس الألوان أزرق کحلی ٔ سماوى والله زمان يا محمد! أخبارك فينك دلوقت لسّاك بتحب الشعر لساك مجنون . .

كل قصايدك عندى حافظاها بتفكرني بأجمل أيام ف حياتي بالسيما . . بالمشايه بطب المنصوره بالضحكة بتاعتك جوزى زى حالاتك وحالاتي دكتور طيب جدا وف حاله ودا عيبه وميزته في نفس الوقت أهلاوي علمنى أتفرج ع الماتشات وكمان علمني ألعب طاوله نخرج مين يا بني إنت عبيط حد بيخرج ويا مراته

ما بيقراش غير أهرام الجمعه بس ساعات بيحل الكلمات المتقاطعه عندى "محمد" لاسع زيك
"ونادين" عقبالك
ما الحق معايا صورهم ف الشنطه
اعقل واتجوز
سيبك من أفكار "العقاد" . . "وأنيس منصور"
دا يودوا في داهيه
لازم نمشي زي الناس ما هي ماشيه
لأ
مش مبسوطه يا سيدي
لو فكرت للحظه ف حالي

الوقت سرقنا كان نفسى أتكلم وياك للصبح هاستأذن

كلمه أخيره من أختك مياده إعقل واتجوز أمتع شئ ف الدنيا إن يكون عندك أولاد واختار أساميهم انت بنفسك طول عمرك شكاك عارفاك غرة تليفونى معاك غرة تليفونى معاك إياك تتكلم!

عبد الرحمن الأبنودي

كان نفسى أشوفك وأقعد معاك... على شط نيلك كان نفسى أخطف من ضي ليلك ونس.. للوحده وجذوة نار كان نفسى أخطف من صهيلك فرس.. أفتح به طروادة الأشعار كان نفسى أعرف هو ليه.. الشعر طاب فوق نخيلك واستوى

من أدان ديك الهوى فوق الجدار ديك النهار من غنوتين من ضحكتين غرقانين ف الهزار والشجن كان نفسى أعرف هو إيه اللي بينك وبين الوطن وليه إنت بالذات اصطفاك وخلاك وقت الإنتصار والإنكسار واستوطنك لما هاجر م الحصار واستأمنك لما حب يسيب النهار ف إيدين أمينه الشعر يا رمان بوصله ف سفینه زرقاء بمامه

الشعر عارف أمتى هتزول الغمامه والحلم يرجع بالسلامه من غربته من يومه عارف سكته رمان زى لامبو وقطته ع الجسر ماشي كالقمر حافي تحت شمس بؤونه والبالونه والصناره تحت الباط والترعه.. عياط الفلاحين والخطوه واثقه والنظره عاشقه ضحكة الناس الطيبين والغلابه ف النجوع والكفور والكتابه مش بصابع موز وجوز الهند وعود بخور الكتابه..

مادنة نور وظهور مسيح والوقوف ف وش الريح والمشى فوق الصفيح الساخن والتحدى للمداخن والغباروانتحار الموهبه بالمفردات الطيبه والموالسه الأرض بنت جميله لكن منتهى الأدب والفجر مهر والقمح الدهب والزفه صبايا بيغسلوا المواعين والعريس فاس مصنوع من دموع العجين ومن خشب الجراح في صدر فلاح بكره الصباح من شقوق رجليك من بصيص الأمل ف عنيك من عرق باطك

وإحباطك من ورق غنواتك من صلاتك فوق شوية قش وقت رش القطن وقت جمع الدوده ما ماتتش "يامنه" "يامنه" لسة موجوده قاعده عند الفرن تخبز البتاوي لأجل تكتب عليه غناوى الثوره يارمان وأجمل غناوى الشوق إنت ساكن تحت ولا ساكن فوق ويا النجوم إنت زى الطيور بتطير ولا زى السمك بتعوم كان نفسى أشوفك وأقعد معاك یا هل تری حلمی ممكن يبقى حقيقة ف يوم.

رحيل دون كيشوت

لأسامة أنورعكاشة

شقت جيوبها الغمامه رقت قلوبها الخدايق والموت حمامه تحت جناحاتها حرايق ودموع خلايق ياما والموت نعامه دافنه راسها في مداسها وإن حد داسها بتقوم قيامه والموت جراده بتقرقض دهبنا وتصحى عذابنا

وتقابل غضبنا بابتسامه الجداول أرامل والسنابل يتامي یا قهره ساده بتشرب وجعنا إدى للعبث معنى يا أهرامات فين الفراعنه فين قريش يا تهامه فين هابيل يا قابيل الحزن ضحكه عزرائيل والعويل هديل الرماد مين اللي مات يا ولاد سأل المداد المشربيه سألت جوامع في شوارع الحلميه دمعة فوق خد الصبيه زيزنيا

اللابسه توب الجهامه جاوب سواد الليل جاوب حداد الخيل جاوب سهاد النيل مجروح المشاعر والكرامه غرقت العوامه لكن" أسامه" صوته ضي وعلامه "زرقاء يمامه" في صحارى الشعوذه لو حد يسأل هو فين ما تشعروش بالأذى قولوا بياخد عزا الشذى في الرجوله والشهامه

قولوا بيدفع جزا الأساتذه قلبه غرامه قولوا تسامي . . ع الدنيّه والخطيه والمنيّه لكنه عمره ما باع القضيه أو تعامى عن ألمنا أو أملنا في الوصول شط السلامه لكنه عمره ما مد إيده الشريفه أو حنى هامه قدام خليفه أو عمامه قولوا قلب الوطن مدبوح وراح يركب له دعامه ما تقولوش مات "أسامه" زينة شباب حتتى

وعمدة قريتى الطيبه المظلومه والموهبه المهمومه والهمامه ما تقولوش مات "أسامه" قولوا بيكتب ملحمه ع الأبالسة والملايك ف السما قولوا قاعد ويا "دانتى" "والمعرى" فوق غمامه بيدردشوا لحد ما تقوم القيامه ف الكوميديا والليالى والرساله ما تقولوش "مات أسامه".

نجومالعصر

سبحان الله.. أفشل واحد ف زمايلي بقى معبود الجماهير سبحان الله جون واحد خلى البيت الطين إتحول قصر والعربية اللي راكبها عرتب كل دكاترة مصر في الوقت اللي انا كنت باذاكر فيه واحرت ف بحور الفيزيا كان بيعط ف سيما النصر كان بيشوف "حمام الملاطيلي" للمره المليون مین انت یا شامبلیون

جنب زميلى اللى بقدرة قادر فك رموز اللغوه المكتوبه ، على حجر العصر والله خساره يا أحلامي أقرا على روحك حتى الفاتحه هادخل معهد سيما يا بابا عايز تدخل إيه يا ابن الفالحه طب هادخل إعلام أدخل نام واتغطى كويس وأغرق ف جراحي وأحزاني وأنا نايم صاحى أرمى وداني ابنك بيهلوس يا "سعاد" شكله كده ملبوس بكره الصبح تجيبي بخور علشان ترقيه بعد الشريا "فهمى" بتقول كده ليه

معقول یا خراشی یا ولاد مش جایز یعنی بيهلوس من كتر الإجهاد مش جايز دواوين الشعر اللي بيقراها لحست عقله كل الشعراء مجانين ومخاويين إبليس من بكره الصبح تاخديهم تديهم "لأمينه" بتاعة الطعميه تعملهم قراطيس ودخلت الطب.. بقيت دكتور بالبس بالطو بامضى حضور ولأنى جبان وعشان ما دافعتش عن حلمي بإصرار أفشل واحد ف زمايلي ستار وأنا واحدم الجمهور.

رسالة إلى ابنى

إزيك يا بنى يا للى ما تعرفنيش هاحكى لك عنى وبكره تعيش وتشوفني مع إنى لحد الآن ما قابلتش مامتك وعظمتك عارف لكن مش راضى تقول وهتفضل طول عمرك كائن مجهول بالنسبه لي قبل ما تيجي وعلى بالي وشايل همك وبادور على مامتك بين ملايين قبل ما تبق جنين بتعيش فين يا ابن الكلب.. جبت اللؤم دا كله منين عايز تعرف من دلوقت عظمتك هتعيش فين والله ما عارف

دايما أبوك متهور وبيفتح على نفسه بيبان ما بيعرف يقفلها يا ابن الكلب.. من أولها عرفت إزاى تكتمنى من أولها قريت شخصية أبوك دكتور الباطنه الصعلوك والفاكر نفسه ابن ذوات والصايع والضايع واللي مقضيها بنات وحشيش بكره تعيش وتشوفني م البيت للجامع وتشوف فوق قورتى زبيبه وتشوف الطيبه ف عيني ومش هتشوف كل ذنوب وخطايا شباب محروم وهاقولك صلى وهاقولك صوم وهاقولك قوم ذاكر

وهاكونلك أنا وأمك ناكر ونكير وهاطلع دينك وإنت صغير وتطلع ديني وإنت كبير وهاحبك جدا وهاقولك عيش حقق أحلامي ما تكسفنيش وأدخل طب رتب ع الدفعه وأتعيّن في الجامعه لأجل ما تبقى طبيب مشهور وهاقولك لف ودور ف الساقيه يا طور وهاموت لو فكرت تثورع الحزب الحاكم أوع الدين وهاموت لو تبدأ تدخين وإنت ف إعدادى عايزك هادى وتمشى جوار الحيط عايزك تبقى بسيط ما تكونشي معقد زيي عايزك تحرق أى قصيده

أصل الفن بعيد عنك وعن السامعين مسكون شياطين مش هتطول لا سماه ولا سقف الناس العاديين خليك معنى بذاتك ما تضيعش حياتك تجرى ورا أحلام كدابه اجرى ورا أحلام ملموسه دنيا الفن دى غابه عايزه نفوس مهووسه باحب الشهره وحب الموت ما انكرش الفن إدالي المتعه كان شمعه ف ليلى ودليلى ف صحرا الأحزان وكمان كان خلى وضلى وشاش على قد جراحي بالملّى

ما نكرش كمان هافضل أحبه أكتر منك يا ابنى يا اللى ما تعرفنيش بعد ما أموت هيعيش فنى وإنت ما تلزمنيش.

الناسفشارعنا

لما طلعت الأول ف الثانويه العامه كل الناس ف شارعنا غنوا ورقصوا ف الوسعايه لحد الأرض ما قالت بس كفايه والشبابيك.. ودنها وجعتها من الزغاريد والشمس.. والشمس.. ولا "عايده الشاعر" في زمانها والبدر وراها بيعزف ع العود.

لما عملت الزايده..
كل الناس فى شارعنا
كانوا واقفين على نبض قلوبهم
على باب مستشفى "سمنود".

لما أبويا إتوفى . . كانوا بياخدوا عزاه منى كانوا بيبكوا بدالى .

كل الناس في شارعنا . .
يا عم . . يا خال
يا عمه . . يا خاله
يا عمه . . يا خاله
وإخوات أصحابي إخواتي ف كل الأحوال
وقت الأكل ما يتحط
وقت الأكل ما يتحط
أقعد أكل ويا أخواتك
دا إنت حماتك بتحبك .

ما عرفتش إنى وحيد..
غير بعد ما خدت الإعفا من التجنيد
ما عرفتش برشام النوم
غير لما بدأت أنام ف سرير غير
اللى أمى ولدتنى عليه.

فى شارعنا..
بيبان الدور ما لهاش مفاتيح
زق الباب وأدخل
مكسوف من أيه
عيب
ما يصحش
هو أنت غريب.

فى شارعنا الناس..
بيصوبوا العيش والملح
بيربوا طيورع السطح
ولسانهم بلسم ع الجرح
وقلوبهم طرح البحر
وطيبتهم..
كالورد النابت ف الاسفلت
كالشمع الوالع ف الغيط الضلمه

فى شارعنا الناس..
رجليهم ف الطين
بس عيونهم باصة لفوق
آخر شفطة ف كوباية الشاى
بيقولوا عليها الذوق
بيسموا بناتهم "بدريه" "وشوق"
ويسموا ولادهم
على اسم أطهرمخلوق

أنا مديون للوسعايه..
بأجمل أيام ف طفولتى
للبحر اللى شارعنا بيطل عليه
طلة عاشق هيمان
ترابيزة البنج ف صالة النادى
كوباية الينسون على قهوة عم "الشحلوت"
أشجار التوت والجميز ع الجسر
مهما تقسى
ليكى ألف جميل يا مصر.

سيتى "ھھيمه"

أمك أميره وطيبه وغلبانه يا محمد والنبى تشيلها ف عيونك أمانه بلاش تزعلها وتخيب أملها ما عادش ليها بعد أبوك ف الدنيا غيرك ما عادش ليها بعد أخوك ف الدنيا غيرك إجدعن كده وشد حيلك ف المذاكره أمك لما تشكى لى من قعادك لوش الفجر بره البيت دا من خوفها عليك بكره لما نموت هتحس بقيمتنا وتشتكي لعضم تربتنا مواجعك بكره هتخلف وتعرف إن الضني غالي بكره الليالي تعرفك قيمة الأهالي

أبوك ألف ورحمه ونور عليه كان أمير كان فقير أى نعم بس عاش طول عمره مرفوع الجبين وإنت طالع جاحد لمين طب بيعلموكم ف المدارس إيه أمك أميره وطيبه.. والزمن دوقها مركتير بلاش تزعلها وتخيب أملها الأخير أختك "سيده" زورها من وقت للتاني الواحده من دول بتتباهي بدخلة إخواتها عليها قدام أهل جوزها بتتحامى فيهم من قسوة الأيام أهلك ناس على قد حالهم لكن علموك أحسن علام دخلوك الطب
كل اللى إنت عايزه بتلاقيه
أقلام.. دفاتر.. مساطر..
دروس خصوصى م
أشيك هدوم
أحدث موبايل
أحدث موبايل
يبقى يا بنى ما تستعرش منهم
بكره تتخرج وتعرف القرش بيجى ازاى

قوم فز إعملنا شاى وناولنى حباية اسبرين من فوق الدولاب صدعت راسى

والكلام..

لا منه فايده ولا منه عايده

وطفى اللمبه اللي قايده ف وسط الدار نور ربنا كفايه

ولا انت بتقول سيتى عاميه مش شايفه يا واديا ابن فهمى دبة النمله باشوفها دا أنا قبل ما أسمع دبة النمله باشوفها

وبأعرف الساعه بالثانيه م الشمس والضله على بسطة السلم سيدك كان معلم وابن سوق وكان بصباص وخباص وعيونه ما يختشوش علمته بمشى ع العجين ما يلخبطوش ستك فهيمه كانت قويه ومفتريه ونظرها اللي راح ما راحش من شويه غيرشي الشقا والفقر ولا كان هيقدر على حتى الموت ما كانشى ميه ف البيوت ولا كان فيه نور كنا بنقول يا دكتور للمزين والواحده تتعب تخاف تبين لا يحجزوها ف المستشفى كان زمن مطين بطين خلفت سبعه

اللي مات ساعة الولاده واللي مات بالكوليرا دلوقت الطب اتقدم والناس اتنوروا كتير عن زمان سيدك الله يرحمه لو عاش وشاف التلاجات والغسالات والمراوح والورقة أم ميتين جنيه كان قال لى الحقى يا فهيمه إجرى استخبى يوم القيامه قرب خلاص إجدعن كده وشد حيلك ف المذاكره عايزه أتباهى بك وأدخل أي مستشفى أقول أنا ست الدكتور محمد وإن حد جاب سيرتك مرة قدامي أقول دا ابن بنتي

یاااااه..یاستی.. رغم موتك من زمااااان صوتك لسه بیرن ف ودانی زی ما تكونی لسه عایشه.

جنتي المفقوده

كانت وما زالت حبيبتى وجنتى المفقوده والملهمه لأشعارى وذكراها عصافير نايمه على رموشى ومشوارى كل خطوه فيه بتوجع عيون ما ناموشى من يوم عيونك يا حبيبتى ما ناموا ما صحيوشى وف عز يأسى بافتكرها الأمل يرجع والفضا يوسع وتزول الهموم وتزول الهموم ما افتكرشى ف يوم قالت لى كلمه جارحه

كلامها كله برتقاني الشنطه والساعه والطرحه برتقاني والدنيا فاتحه حضنها ومداريه حزنها تحت ضحكه برتقاني بعد ما تخلص كلامها تبتسم تضحك ضحكه خجوله ضحكة مزيج م الهديروالهديل والطفوله كنا لسة ف أولى جامعه والدنيا واسعه وبراح والصباح أطعم كتيرم النسكافيه كان يملا عين سواقين التاكسيات أيامها كانوا بيضحكوا ف وش الزباين والجرسونات ف الجناين

والبنات ف المكتبات

كانوا تمللى بيضحكوا ف وش الزباين ضحكة خالية م الغرض زى ما يكون المرض صاب حبيبتى وصاب البلد في نفس ذات اليوم

یا هل تری فاکرانی باوحشها قد ما هی واحشانی طب إیه حایشها تیجی وتطبطب علی أکتافی و تضمنی ف حضنها الدافی

معقول سكوتك يا حبيبتى هيفضل للأبد يتعبد يا رب ليه تخلق ساعات إنسان يتعبد وبتخطفه ف زهرة شبابه يا رب آسف سامحنى

یا هل تری اللی ماتوا هما اللی ماتوا ولا احنا اللی متنا یا هل تری بیسمعوا صوتنا ولا بیسمعوا صدی ولا بیسمعوا صدی .. صدی .. صدی .. صدی ..

أبوسمرهالسكره

قلبه أحن م اللبلاب
والبلابل لما بيعوزوا يستحموا
ما يلاقوش غير عيونه جداول
لما بيعوزوا يغنوا
ما يلاقوش غير صوابعه غصون
لما بيعوزوا يصلوا
ضحكته محراب..
قاعد تملّلي وف إيده الكتاب
والسيجاره السوبر
وقدامه كوباية الينسون
النهارده ستة أكتوبر
يوم ميلاده
ما حدش بيسأل عليه من ولاده

غیر یوم ما یقبض بس أنا باعتبره أب لما بابقی متضایق باطلبه ألووووه .. یقولها بصوت جهوری و

يقولها بصوت جهورى ومعدنى أسكت

> يكررها أطول شويه الوووه..

> > اسكت برضه

شكلك تبع إخوانا البعدا

أسمعها وأدبدب ف الأرض من كتر الضحك إزيك يا محمد

مش هتبطل ألاعيب إخوانا البعدا النمرود عمال يبعت لى دكاتره يراقبونى ويحطوا لى السم الهارى ف قلب الأكل النمرود مش ناوى يجيبلها له بر بيموت ف الشر

لكن دمه خفيف بيسليني ف وقت فراغي وأنا كبرت دماغي خلاص حطيت أعصابي ف تلاجه مش عايز حاجه أنا باحكم ف العالم من مطرح ما أنا قاعد إيد على إيد أهى برضه تساعد شكرا يا أبو سمره یا سکر حبيت أسمع صوتك مش أكتر وأقولك ياللا حالا بالا شكرا يا محمد خد بالك من نفسك وأوعى تسيب الشعر عشان الطب هو اللي مخليك إنسان تصبح علی خیر تصبح علی حب

وإنت كمان وأقفل وأنا فرحان إن الدنيا فيها أبو سمره وأفرح إنى قابلته قبل ما قابل أحزاني واتصالح مع نفسي وابدأ من تاني طريقي أبو سمره ف رأى الناس مجنون لاسع راحت منه ومش راجعه وف رأى الطب النفسي فصامى ومسكون ضلالات وف رأيي أطيب إنسان ف الكون وأظرف إنسان ف الكون

وعلاجه جريمه والدنيا بدون أمثاله عديمة اللون والطعم أنا عشت معاه سنتين كاملين شجرة ياسمين من لحم ودم نجمة صيف طفل كبير صادق مع نفسه بشكل مخيف وشعاره طول ما أنت ما بتضرش غيرك إعمل ما بدالك أبو سمره كان كاتب على كل جدار ف الوحده الصحيه أنا باكره كل الناس الخونة الأشرار أتباع النمرود واخوانا البعدا لكن كان أكتر إنسان بيمد إيديه للناس

ويقول لى: الدنيا جميله وتستاهل تتعاش ويقول لى: الستات بيحبوا الراجل الخاين والغشاش ويقول لى: طوب الأرض بيكرهني حتى الحشرات حتى النمل المعروف بالطيبه وبالإخلاص دایما یقرصنی فی مکان حساس الخمره مفيده لكن إدمانها بيهري الكبد وأنا قدك خدت الدنيا ف صدرى يا ابنى أنا أفشل واحد ف إخواتي أنا أفشل واحد في الكون

ملحوظه: بيقولها بدون أى مراره الراجل ف سلام مع نفسه أكتر من بوذا ملحوظة كمان.. أبو سمره مش شاعر لكن يعشق يتكلم بالسجع مثلا وأنا باكل مكرونه سابنى وراح البلكونه ويموت على نفسه من الضحك وانا طبعا أكتر منه إحنا الاتنين أكبر مجانين ف الدنيا مجانين مجانين بس نعيش

أبو سمره
من مواليد ٥٥ .
شكله أقرب للألمان م المصريين
لكن يضايق جدا لو واحد قال له:
شكلك مش مصرى شكلك ألمانى
بيقول عن نفسه..
أنا صوره طبق الأصل من رمسيس التانى
ويطلع صورته من محفظته

أبوسمره حكايه طويله قد ما تبسط قد ما توجع قد ما توجع الله يمسيك بالخير يا أبوسمره وصوتك يفضل ف الدنيا ملعلع

الدنيا تلاهي وواخداني لكن ذكراك أيامك لياليك ساكناني م المحزن جدا إنك ممكن يديك طولة العمر إنك ممكن يعنى من غير ما أعرف من غير ما خد منك حضن طويل وأخير من غير ما آخد يا صديقي عزاك

لكن بيصبرنى إنى بعد ما موت هابقى معاك هابقى معاك يا أطيب وأظرف إنسان ربنا يديك طولة العمر عشان يا صديقى نموت مع بعض كمان.

یا مصر

كل مركب ليها مينا
ليها مرسى
وإنتى يا بلدى الحزينه
على مر الدهور
موج يشيلك
موج يحطك
إعصار يروح
طوفان يجيلك
والشط يفتكرك وينسى
والمراكب كلها وصلت
وإنتى لسه بترقصى رقصة المدبوح

زوريا المصري

يا نخله بتمطر بلح في أرض بور وسنين عجاف قلبى لم عمره شاف يا كامل الوصاف حد زيك في سماحتك وف صراحتك وف نصاحتك وف قلبك الطيب كما قلب الطيور والزهور والفراش وف عقلك الناضج في نار التجربه الدمعة ف عيوني مكدبه إنك خلاص طالع معاش واش یا واش الشمس بتقولك بلاش والصبح بيقولك بلاش الدنيا هتضلم يابو كلمة بتعلم ع القلوب والضماير والستاير والحيطان يا بو ضحكه غيط برتقان عايز أقول للحظ شكرا بامتنان إنى قابلتك في الطريق يا أب وصديق في زمن خوان وف دنيا غابه يا بو طله بتخلى الكأبة سرور حضرتك دكتور ولا شاعر ربابه ولا عازف عود ولا سندباد دايما بتيجي ف الميعاد وضحكتك سابقاك وجايب معاك ألف نجمة صيف ألف مركب ألف جدول ألف أغنية من أجمل أغاني زمان قعدتك مهرجان كرنفال

احتفال بالحياه والوجود حضرتك مولود في برج الحوت ولا في برج حمام اسمك إمام وانت ف اللمه إمام وف القمه إمام وف براءة الذمه إمام وف علو الهمة إمام ومش ناقصك بس غير العمه والقفطان وتبقى إمام في الدين يا موسوعه الدمعه ف عيوني بتقول لك وهي موجوعه والورد بيقولك سلام ناصية كل شارع في مصر القديمه بتقول لك سلام مادنة كل جامع أجراس الكنيسه البالطوا الأبيض كارنيه النقابه المرضى الغلابه كل طرقه في مستشفى دار السلام بتقول لك سلام والغمام بيقول لك تحت أمرك كل الأمنيات نص عمرك فات لسه باقى نص تانى لسه قدامك طريق مفروش أغانى ما ابتداش يا ما لسه ف الجراب

مليون كتاب

أيام جميله ما عشتهاش

ألفين جزيره ما زرتهاش يا سندباد

أجلام ولاد

مصرنا التايهه ف البلاد تعود وتضمها ف حضنك بشوق نيلنا المريض في غرفة الانعاش يفوق

ليلنا الطويل يطلع له فجر

يشبه لك تمام

في صراحتك وف سماحتك

وف قلبك الطيب كما قلب الطيور والزهور والفراش

مش باقول لك

لسه قدامك وقدامنا

طريق مفروش بالتمرحنه ما ابتداش.

إلى الفاجومي

(1) يا أبو "نواره" إهدى قلوبنا المحتاره إهدم أحزانا الجباره عارفك واقف على قبر ولادنا بتوع المسرح وبتوع القطر وبتوع العباره ودموعك نازله بغزاره ومراره ألف ندامه وألف خساره بتسلم بتعزى حاضن أحزانا بحراره عارفك بتحارب أشباحنا بكل جساره

يا أبو قلب مناره يا أبو ضحكه حضاره يا أبو كلمه بتفهم أكتر من ألف وزاره يا أجدع وأشجع وادف الحاره عرفني ازاى بتلخص ف عباره جراحنا.. يا مصباحنا وشمس صباحنا دايما تلمحنا وتفضحنا وتجرحنا.. وتنصحنا وتمنحنا السلوان دايما حابب مطرحنا دايما واقف ف المحنه في ريحنا دايما تفرحنا في عزالأحزان يا جنينة فاكهه ومفتوحه لكل جعان یا أدان قلبك ياسمينه ساعات وساعات صوان قلبك هو السد العالى ف نيل أسوان

هو الكحكه ف إيد غلبان هو القله ف إيد عطشان هو الضحكه المرسومه ف عين شقيان هو القمح الطارح في غيطان كل المصريين هو دعاء الأم في ليلة قدر هو سماحة الدين هو اللمه الحلوه وساعة الحظ هو الخطبه السياسيه الرنانه وطظ هو الشاى وسيجاره وأنا كده عايش سلطان هو البنت المصريه المليانه نضاره معديه وشكل الدنيا هيبقي إزاى من غير نسوان هو رادار وكمين ف السكه وكله بيدى لكله إشاره هو شهامة كل ولاد الحاره وأشعريا "جيفارا" يا أبو "نواره".

إضحك يا فاجومي وضحكنا معاك إضحك يا شيطان وملاك إضحك يا مخلّى الزنزانه جنينة أسماك أصل الضحكه بتاعتك صافيه ودافيه وشافيه ووافيه واحنا بلا قافيه صارت ضحكتنا بتطلع بالعافيه صفرا وحافيه زى اللى بيغسل أسنانه بمسواك كارهين الدنيا وبنرفرف نفسى أعرف قادر ف السجن إزاى تعشق دنياك الحلوف إيدنا كاس علقم والمر ف إيدك

ويسكى وكونياك شايل سيفك بتحارب واحنا بنتفرج من شيش شباك خايفين من طيفنا ومن خوفنا وإنت أمك م الخوف فاطماك عارف حقك بتحاول تاخده حتى أن كان على كف قضاك شايل كفنك ماشى تغنى بتهزر والموت بيهزر وياك فاهم أولها وأخرتها والفوله ولبتها مديها الطرشه مدّيها قفاك عایش یومك رامی همومك كل هموم الدنيا راميها وراك دايما راجل ملو هدومك والكلمه بتاعتك من راسك من جواك

والقرش اللي يذلك بين ناسك ينداس بالجزمه ولاليه لازمه طول ما الستر معاك يعنى سعادتك هارش كل الليله والدنيا الهابله مش هابلاك حالق ومكبر ومنفض للنفخه الكدابه سبت الغابه وعايش زى النساك ماشى وكاشف كل جيوبك كل عيوبك كل ذنوبك ماشى ورافع راسك ثابت في خطاك واحناف سيوك كل الناس بلياتشو جميل بس الواقع مين أدراني ومين أدراك نفسى تعلمنا جنونك يا فاجومي دا احنا العقل بتاعنا هلاك أضحك أضحك يا مخلى الزنزانه جنينة أسماك

أشعر يا أبو نواسنا يا ونسنا يا فارسنا مش ناقصينك بس إنت ناقصنا شعرك بلمسنا عرفنا ساسنا من راسنا ضحكنا وأفرسنا داحنا لحسنا واحتاسنا مات احساسنا أفلسنا بعنا نفوسنا ونضوصنا وعاداتنا وطقوسنا قاعدين بنمجد ف لصوصنا وتيوسنا وفلوسنا بنجيبها من دعك فانوسنا مش من فاسنا وروسنا

أصل القهر داسنا بمداسنا دهسنا هرسنا مش عارفین ناخد منه نفسنا قلعنا لباسنا کل ما یلعب فینا رقصنا و کمان ناوی یورثنا.

(1)

اتكلم يا فاجومي يسلم فمك ولسانك دايما سابق عصرك وأوانك زى الأنبيا وأدانك بيصحى الناس الأغبيا يصلوا أتكلم واوعى تبطل سخريه وإن شالله عدوينك يتشلوا أو ربك يبليهم برزيه من كتر بجاحة أهاليهم واقفين فوق روحنا المحنيه يبنوا ويعلوا حبة حراميه سارقين الشمس ونورها وضله واكلينها ولاد الإيه شافيه مشفيه وكمان بيحلوا ويقولوا الشعب بتاعنا إيه اللي جراله

إيه اللي حاصلوا مش عايز ينضف ليه من حقده وغله احتارنا يا أمريكا في حله الشعب المصرى إيه اللي فاضله دا احنا يادوب بنلاقي رغيف العيش حزمة جرجير قرصين طعميه وعصيرنا حبة سكر ف المية نبله طالبين الستر ومش عارفين نوصلُه لو نسمع أحيانا أن فلانا يكسب كام مليار ف الشهر دايما بنسبق حسن النيه ونقول أذكيا والرزق يحب الخفيه أما احنا ولاد فقريه اتكلم يا فاجومي.

هنا القاهرة

والله ليكى يا مصر رهبه وليكى هيبه وليكى مله عجيبه وليكى مله عجيبه وليكى طله كئيبه والغريبه إنى جاى لك كلى شوق كلى شوق أمسك نحومك مين يلومك لو قسيتى ع الغريب واللى جايلك من بعيد وإنتى قاسيه ع القريب والحبيب مين يلومك

من عجايب شعب سایب كل جسمك یا صبیه و خای ینام فوق كف إيد مين يلومك وإنتى حاطه في المحطه باب حدید وسيوخ حديد واقفين عساكر والتذاكر قاطعين نشالين والشحاتين.. مرصوصين ع الرصيف عقارب والبياعين تعالب والسواقين عناكب والمناكب ف المناكب فى الشوارع والباصات

والسيمات والمولات والقهاوى والكبارى والمراكب واللي راكب.. عايز يدوس ع اللي ماشي والهوا بفلوس في مصر يا خراشي! فاشى قلبك ولا نازى ولا سادى كله عادى كله راضى عن حياته الغير لذيذه طول ما مترو "الجيزه" سايرع القضيب طول ما مترو "المرج" طایر زی الحدادی في سحاب الاكتئاب طول ما ضلى لاقى ملَّى يصلى فيه كل نوبة اغتراب

طول ما كتفى لاقى سوريركن عليه بعد جريه خلف السراب ليه نصيبى سطر أفرح وأفضل أبكى باقى الكتاب ليه يا غاليه ونجمه عاليه ملحوسينك بالتراب ليه يا مصر؟

لو كنتى دفتر كنت قطعتك مذاكره

لو كنتى لون..
كنت هاسرق منه لوحة موناليزا
برج بيزا
إزاى أسيبك
وأنا حتى عيبك شايفه ميزه
وأنا قلبى عاشقك بالغريزه والإراده
والسعاده بتكون لذيذه
لا تبقى غصب عنك واختيار.

لو كنتى فكره..
كنت هاسرق منها نار المعرفه
وأهدى الدفا للبردانين
وأهدى الشفا للمجروحين
وأهدى الصفا للمهمومين
وأجعل شعار العاشقين ضحكتك

لو كنت عارف سكتك من سنين كان زماني صرت شاعر في بلاط ملك الحنين ووصلت من أقصر طريق مدن اليقين وعرفت مين خلى عيونك كعبة الياسمين والبلابل وأجمل كتير من حدايق بابل خلانى قابل أفضل سجين دار رموشك من غير ما أفكر لحظه واحده ف الهروب خلاني أتوب عن ضلالي وأسهر ليالي حاضن قلوب حمرا وأكلم الدبدوب وأكسر كؤوس الخمره فوق البار وأحلم برنه أو رساله وأدخل في جنه من تحتها بيجرى العذاب أنهار كل الصحاب كانوا بيقولوا استحاله إنى أعقل

وإن شوفت بس بنت أجمل حبتين هاسيبك وهارحل من غير ما أقول أعذار من غير ما أقول أعذار من غير ما أسأل في دموع الذكريات أو ربيع الأمنيات أو وعود ديك النهار من غير ما أسيب باقة ورود فوق مخدة الانتحار.

لو كنتى مركب..
كنت صرت أمير بحار
سندباد
وسافرت بيكى أرض الميعاد
وطلعت فوق جبل العناد
وصرخت قلت فى افتخار
أنا وإنتى شعب الهوى الختار
والجنه لينا والانهار
وبقية العشاق ف النار.

لو كنتى زهره..
كنت هاخرج فى مظاهره
ضد بقية الأزهار
وأعلن عبيرك أمير
وابنى دير م الشهد
وأعيش ويا الفراش
وإن ما جاش الربيع
ما يهمنيش هيهمنى ليه
وانتى يا زهرتى مابتدبليش.

لو كنتى ثوره.. كنت صرت "تشى جيفارا" كنت أطمن كل خايف كنت أحرر ورد الشفايف من كرابيج السيجاره وأبنى حضاره أروع م الحضاره الفرعونيه وأهدى غنوة الحريه لكل سجين وأعمل دين سماوى للعاشقين وأداوى كل ليل تعبان من دلال النجوم وأصوم زى غاندى إن مر يوم من غير ما أشوفك إن ما عرفتشك أغزل من حروفك أجمل عباره لو كنتى ثوره . . كنت صرت "تشى جيفارا" .

لو كنتى أغنيه..

كنت لحنتك ووزعتك
وغنيتك وخليتك نشيد غصون الشجر
العاشقه ضى القمر وهمس الريح
وشمس ست الحسن
لو صحيح إنى عارفك لجل بوسه و لجل حضن
كنت سبتك
من زمان وكان
شوقى هدى
ما نكرشى إنى باتعدى من أى لطشه بنت جامده
وعرفت قبلك ألف واحده

وكأنى لسه بابتدى وكأنى قطه مغمضه حبك فضا وقلبى طير فارد جناح الفضفضه والقضا والقدر مخنوقين وكارهينا عمى عايزين حنينا ينزل م السما لكن قلوبنا منفضه سيبك يا حبى من كلام الناس الحب ماس كهربا بين الجفن والأحلام يا طيبه وقريبه من صمام القلب ومن كلام الرب ومن سلام الروخ يا سفينة نوح أنقذيني من طوفان الهم وأفضلى.معايا وخلى غنايا یحرق دم الحدادی
ابتعادی مش دلیل إدانه
الحب بیبان ف الخیانه ساعات
والشمس لو غابت تلات
بتیجی الأربع تعتذر
قفوقی کل وعد وعدتهولك
کل حرف کتبتهولك
یا کلمه مش عارف أقولك
یا نخمه مش عارف أطولك
ریحینی و دوقینی من نخیلك بعض الثمر
یا میلادی ومهدی المنتظر.

لو كنت بنت من بنات الغجر .. كان زمانك خطفتى من "كارمن" الأضواء ودخلتى جنة الأشواق من أوسع بيبانها فين غصن بانك

فين جنانها من جنانك معجون سنانك أحلى ألف مره من ثغرها ومشطك أجلى ألف مره من شعرها وكفك هياكل صوبع سحرها بسهوله لحظتها "كارمن" هتسجد وتتأكد من إنك رسوله معقوله لولا نهودك كان "إميل زولا" قال اللى قاله كان "مختار" نحت تمثاله كان "دانتى" أطلق لخيول خياله العنان معقوله لولا خدودك.. البدر كان هيبان الورد كان هيكون نرجسي معقوله لو قلبك قسى تبقى فيها أغصان كريمه أو أوطان رحيمه متعرشه بغاب الأمان

متقفله بباب السكينه متحوطه بلبلاب المحبه والضحكه الحميمه معقوله لولا وجودك في حياتي . كان هيبقي لها قيمه . لو كنت بنت من بنات الغجر كان زماني صرت خيمه كان زماني صرت خيمه وعملت عنك ميت فيلم سيما

لو لو لو كنت دفتر كان زمانى صرت أشطر وقطعتك مذاكره.

نادرجدا

نادر جدا أفضل واقف ساعة حداد على حد نادر جدا إنى أتشد لحد أحب بجد شبه محال كنت باشوف الحب خيال لعب عيال وتسالى لعب عيال وتسالى نبت شيطانى وطالع ف القلب الخالى شوفتك واقفه جنينه ورد نجمة سيما تمثال إغريقى أجمل برفان ف الدنيا ومرشوش فى طريقى وش لأول مره باشوفه بس صديقى أخويا شقيقى .. عشيقى

دایما واقف جانبی فی فرحی وضیقی شربة ميه وبلت ريقى وأنا عطشان حب لأول مره باحسه بس حقيقي مادنه جامع .. محراب.. مأذون.. فاتجه . . كتب كتاب . . زفه وطرحه . . بلابل فرحه إيدك على كتفي في صوره في برواز أنا وإنتى وباب مقفول مش معقول . . دستة اطفال فيلم هيتذاع الليله بمناسبة نصر أكتوبر سينا.. الطور.. عمر ومشوار الصدفة الأجمل من ألف ميعاد حبك يا حبيبتي قصيده ومكتوبه في عين الأولاد عودي كفايه عناد وبعاد ماذا وإلا هافضل واقف عمرى بحاله عليكي حداد وأنا نادر جدا أفضل واقف ثانيه حداد على حد.

ليه

هافضل طول العمر أسأل روحي ورحك ليه إيه معنى حياتي وأحن وأئن وأفضل أحاسب وأجلد ذاتي مشاعري آهاتی حروف أبياتي أصل أنا طيب جدا ساذج جدا أبيض جدا من جوايا وعلى نياتي عمرى ما باعرف ألف وأدور وأعيش في الدور يا عيون مولاتي

وأرجع أقول إنى باحبك.. رغم بكايا هافضل أفكر فيكي العمر بطوله هافضل أحبك بعد مماتي یا مغروره بصوره أشد بس ساعتها هاحاول أكون سباح قد المد وقد الجزر وقد جراح الشوق والصد وأرضى غرورك قبل ما أفكر يوم ف العوم ف بحورك حد بجد تلاقى جنونك فيه بس لحد ما أموت أسف جدا هافضل أسأل روحي ورحك ليه.

بعد النهازده

بعد النهارده مش هاشوفها إلا إن شاءت ظروفها كل فين وفين ولا هاصطبح بأحمل عنين وأجمل شفايف وأجمل إيدين وأجمل كلمة ازيك تقولها بابتسامه بتخلى قلبي يطير حمامه للسحاب بتخلى روحي تدوب حنين بتخلي عمري يعيش يومين سلطان زمانه زى "هارون الرشيد" زى الوريد بعد حقنة "المورفين" زی صوفی لحظة وجد زی خوفی لحظة اطمئنانه يا غنوه غناها "شكسبير" في حلم ليلة صيف يا لحن "بتهوفن" يا لوحه من لوحات "بيكاسو" لو شعرى يوصف نص اللي أنا حاسه يبقى أمير الشعر.

لأ بجد ..

بعد النهارده مش هاشوفك صحيح
إلا لو نزل المسيح
طب قلبى فين م الحكايه
عارفه إنى كاتب نمرتك
عارفه إنى كاتب نمرتك
عارفة إنى ياما باتكلم معاكى بالساعات
عارفة أنك يا ما قولتى لى باحبك
ياما سرحتى لى شعرى
ياما دلكتى لى ضهرى
ياما دلكتى لى ضهرى

ياما اتخانقنا ياما اتصالحنا ياما سافرنا شرم والغردقه

امتى هتحسى على دمك بقى
یا دنیا یا مفرقه الأحباب
یا مسبقه بالفرقه
فاكره یا روحی وقفتی بالطرقة بالساعات
کانت عشانك
فاكره اتصالی ف انصاص اللیالی
کان تلکیك
کل شیء فیكی شیك . .
لبسك
ضحکتك
ضحکتك
قعدتك

أسلوبك ف الكلام مدة ايديكي ف السلام كلمة (ازيك) من شفايفك فوج حمام طاير للسما السابعه بجناحات وردى الود ودي يقف الزمان والنجوم يتجمعوا عشان يشوفوا ويسمعوا الشعر الحقيقي الحظ اللي حاطك في طريقي نفسى أخدة بالأحضان نفسى أشكره بشده هافضل أحبك حتى لما تصيرى جده وإن حد فكر يحرمني منك هتقوم حرب رده بعد النهارده هافضل أشوفك

حتى لو رفضت ظروفك كل ثانيه هافضل محافظ على شعرة معاويه حتى إن كنت ناويه تقطعيها بارتحالك جايز أكون مش في بالك وف حياتك حد تاني حد بانی بيني وبينك ألف سور صدقيني مش غرور لو قلت لك قلبك مش بين ضلوعك قلبك موجود معايا لو عايزه تشوفيه أهلا بيكي في أي وقت بس ما تحاولیش تقنعیه یسیبنی عارفه ليه ر لأنه مش هيرضي.



يكفيك سلامها

يكفيك سلامها ومعاك رقمها "طرواده" أسهل في اقتحامها بس واضح من كلامها لسة خارجه من قصه اليمه وشعورها واجب احترامه كل واحد في غرامه حر احساسي قال لك م البدايه للخلف دُر بس إنت ما سمعتش كلامه حبيت تدوق طعم الهزيمه المر مش عايز تفوق

التزويك التزويك وتعيش الحقيقه
بتطير لفوق
وتشر شوق
لما تضحك لك ضحكه بريئه
مش رقيقه دى الرقه ذاتها
من أغنياتها العندليب بيغير
ومراياتها كاتبه فيها بالعبير
مليون ديوان
يا بخت معجون السنان
والمخده والسرير.

الموظفون في الأرض

عيب عليك وإِنت فار واقف في غاية الانكسار في انتظار إمضة حمار شغال موظف أو موظف شغال حمار بيبص لك من تحت نضارته السميكه باحتقار وهو بيخلص فطار وبيولع سيجارة السوبر كأنه بيولع سيجار وبيقول لك باختصار وعينه بتطلع شرار العش طار والفشار محتاج خنفشار وإنت بقلبك الطيب وعقلك المحتار مش عارف كلامه جد ولا هزار

عايز يقول لك خلى النهار يعدى العيشه زفت يا فندى والأسعار والجو نار والمرتب مش مقضى تمن الخضار ولما باعدى ع الجزار بافكر في الانتحار الود ودي أرجع بكيلو تحت باطي للعيال في الدار واحباطي ما لوش قرار وباشرب السوبر استخسار صدقني لولا الضنك والعيشة المرار كان زماني صرت صاحب ليك وجار كان زماني صرت الطف م الطيور والزهور والمراكب في البحار عيب عليك.

إحمد ربنا انك بقيت دكتور

إنت في نعيم والدليل قاعد في العياده بانش شكلك وسيم ما أفتكرش دا الشعر خف وطلع لي كرش والجيب منفض کش مات مين هيرضي م البنات بيا جوز والحظ مادد بوز والكبت فرقع لوز بيصلى الفجر في الخماره والمصيبه ليا جاره

نهودها لوز ودراعها موز متجوزه راجل عجوز یا خساره بركان غوايه لما تمشى في العبايه السمرا ألف جمره في دمي تولع والآهة تطلع تحرق غابات عاجزه اللغات عن وصف اكتئابي یا ألف حسره یا شبابی يا للى ضيعت في المذاكره وتمقيق العينين في مواد أكأب من الزنازين وف تمنى خمسة عين لو تعود بيا السنين أدخل آداب أو تجارة مهنة تفقع مليون مراره والمرتب مش مكفى تمن كتابين

ويقولولك وانت في التلاتين أصبر شوية وحضر رساله والحاله تبقى ميه مينه وإنت بجهاله وبغباء تسمع كلامهم وتقول لنفسك ناس كتير ربك كرمهم وأكيد هاكون حد منهم في يوم من الأيام ويفوت عليك عام بعد عام وإنت واقف مطرحك وتشوف زمايلك يدبحك سيف الندم وتحس مجهودك عدم ووجودك عدم وتغوص في بحر الأكتئاب وتبص خلفك

تلاقى الشباب اختفى عن مدى النظر ما عادش باقى غير قدر دكتاتور دكتاتور بيقول لك بقيت دكتور.

المحنور

- يا مصر 85
- زوربا المصرى 87
- إلى الفاجومي 91
- هنا القاهرة 101
- لو كنتى دفتر كنت قطعتك مذاكره 105
- نـادر جـدا العرب ا
- لـــه ا
- بعد النهارده 119
- يكفيك سلامها 125
- الموظفون في الأرض 127 <u>الموظفون في الأرض</u>
- إحمد ربنا انك بقيت دكتور 129


للنشرفي السلسلة:

* يتقدم الكاتب بنسختين من الكتاب على أن يكون مكتوباً على الكمبيوتر أو الآلة الكاتبة أو بخط واضح مقروء. ويفضل أن يرفق معه أسطوانة (C.D) أو ديسك مسجلاً عليه العمل إن أمكن.

* يقدم الكاتب أو المحقق أو المترجم سيرة ذاتية مختصرة تضم بياناته الشخصية وأعماله المطبوعة .

* السلسلة غير ملزمة برد النسخ المقدمة إليها سواء طبع الكتاب أم لم يطبع .

كان عمري سنا شرريبع



محمد فهمي

استطاع الشاعر من خال هذه القصائد أن يقدم رؤية جديدة للعالم الذي يعيش فيه، وأن يفلسف هذه الرؤية في شكل فانتازي أحياناً، وواقعي أحياناً، وواقعي أحيان أخرى، من خلال لغة شعرية بسيطة وعميقة في أن واحد، موظفاً اليومي مبتكرة في معظم القصائد، وصور شعرية بسيطة وعميقة مبتكرة في معظم القصائد، في أن واحد، متكئاً على ثقافة في أن واحد، متكئاً على ثقافة منتوعة تتبدى داخل الديوان وتوظيفها بشكل متقن

(عبده الزراع)



17

منان أحمد الجنايني

